

**REGIONAL NEWS BULLETIN
HEADLINES (EVENING)**

Date – 26/10/2024

Time - 18:30 Hrs

1. Chief Minister Pu Lalduhoma'n Aizawl khawpuia Assam Rifles hmun thenkhat chu nakum April ni 1 atangin Zokhawsangah sawnchhuah a ni dawn a ti.
2. Larsap Dr. Hari Babu Kambhampati an CADC a primary atanga a chunglam zirnaah Mizo subject zirna kalpui a ni tur chuan Mizote nen inlungualna leh inzahtawna a thlen a beisei a ti.
3. President Draupadi Murmu chuan ram hmasawna a puitlin theih nan tlangmi tribalte chu an tel ve ngei a ngai a ti
4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn.

<><><>

CM-SHIFTING OF AR

Chief Minister Pu Lalduhoma'n Aizawl khawpuia Assam Rifles hmun thenkhat chu nakum April ni 1 atangin Zokhawsangah sawnchhuah a ni dawn a ti.

Sorkar laipui dawra New Delhi a a zin chu vawiin khan lo haw in, Chief Minister hian Assam Rifles insawnchhuah tur thu hi vawiin khan a puang nghal a, CM Conference Hall-a thuthar thehdarhtute a kawmna ah Pu Lalduhoma chuan Assam Rifles sawnchhuah tur chungchangah inremna thuthlung chu New Delhi a a cham laiin Mizoram House ah an ziak a ti a, Mizoram sawrkar aiawhin Vanlaldina Fanai Secretary to CM in a ziak tih sawiin Assam Rifles aiawhin Director General Vikas Lakhera chuan a ziak a ti.

Chief Minister chuan Assam Rifles building chhuahsan tura chhiah lak tur te chu nakum April thla ral hma in Assam Rifles hnenah Mizoram sawrkar chuan a pe dawn a ti a, Assam Rifles in Mizoram sawrkar hnena a hlan ram leh building te chu Mizoram (Restriction on Use of Transferred Land) Act, 2022 sawi angin mipuite tana hman tur a ni tih a sawi.

Chief Minister Pu Lalduhoma chuan Mizoram Assam Rifles awm mek 2nd Assam Rifles te chu nakum April thla ah Battalion dangin an thlak dawn tih a sawi bawka.

Assam Rifles tuna awm mek te nen inlaichinna tha tak neih an duh a, tun hnaia P&E Minister Pu Rodingliana leh Assam Rifles inkara buaina thleng pawh a tha zawnga her an tum tih sawiin tuna Assam Rifles battalion awm mek an chhuah dawn avangin an inkarah inlaichinna tha awm se an ti tih sawiin thlamuang taka chhuah tir an duh a ti.

Chief Minister hian hemi chungchangah hian Assam Rifles hotu Vikas Lakhera nen inhmuin Mizoram remna leh muanna a awm zel theih nan Assam Rifles leh sawrkar thawhho an duh an ti a, Assam Rifles lamin Assam Rifles Act leh ND&PS Act tlawhchanin thil an ti thei tih sawiin P&E Minister chungah an thiltih leh state chhunga an hmalakna hrang hrang ah pawh dan tlawhchhanin an ti ve a ti a, hun lo awm turah erawh state police leh excise te nen thawkho turin an inhrilh a ni a ti.

<><><>

CM – MIZORAM CS

Mizoram Chief Secretary Dr Renu Sharma pension huna thlaktu tur a an duhdan te sorkar laipui ah an thlen tih Chief Minister Pu Lalduhoman a sawi. Pu Lalduhoma chuan Mizoram Chief Secretary ni thei tur zingah duh an thlan theih nan AGMUT Cadre IAS zinga Chief Secretary dinhmun chelh thei te hming pe phawt turin a ngen tih a sawi a, tunah hian sawrkar laipui a Ministry of Civil Aviation Secretary nilai Pu Vumlunmang Vualnam chu Mizoram Chief Secy a dah an beisei tih a sawi bawka ni.. Manipur Cadre, 1992 IAS Batch chu Pu Vumlunmang Vualnam chu Mizoram Chief Secretary thar atan a dil a, Union Home Ministry-a Secretary hnenah an dilna hi thlenin, sawrkar laipui a thuneituten an lo ngaihtuah zui dawn tiin an chhang a ti.

<><><>

GOVERNOR

Larsap Dr. Hari Babu Kambhampati an Chakma Autonomous District Council Executive Committee in primary atanga chunglamah Mizo subject zirna kalpui tura thuthlukna an siam chuan Mizote nen inlungualna leh inzahtawna a thlen a beisei tih a sawi.

He thu hi vawiina Mizoram Chakma Students' Union, Zonal Hqrs. Aizawl buatsaih zirlai tharte lawmluhna leh Awareness Campaign, Vanapa Hall-a neih a hmanpui na ah sawiin Larsap chuan CADC hotuten Mizo tawng subject ah dah an tum chuan zirlaite tawng chihnih bel taka thiam kawngah a pui thei dawn a, Mizo tawng thiamna chuan Mizote nena inbiakpawh leh inhriatthiam kawngah thui takin a pui theih dawn bakah zirna leh hnathawhna hmun thlengin a pui thei dawn a ti a. Mizo zirlai pawl dangte nen lungual leh inzahtawn taka hmalak tlan a pawimawh thu sawiin Tualchhung amite tihdan leh hnam ziarangte zira inherrem pah chungah kalphung, khawtlang nun leh rinnate zah tak chungzel midang nena inpawh taka awm turin kalkhawmte a chah a ni.

<><><>

RED BULL URBAN DOWNHILL BIKING

Thirsakawr hmanga infiamna hriat hlawh tak Redbull Urban Downhill Biking Event, ramchhunga a hmasaber chu vawiin khan Aizawl-a Republic Veng-ah buatsaih a ni a. Vawiin inelnaah hian Taiwan mi Chiang Sheng Shan chu pakhatna a ni a, Indonesia mi Rama Teguh Adi Pratama chu pahnihna niin, Yawar Ali Khan Jammu & Kashmir mi chu pathumna a ni. Redbull Tlang Ruam Aizawl-a neih ah hian intlansiak mi 21 an tel a, ram pawn atangin mi pali an tel a, Mizo pathum an tel bawk a ni. Kan corr report lo ngaithla ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

PRESIDENT

President Draupadi Murmu chuan ram hmasawna a puitlin theih nan tlangmi tribalte chu an tel ve ngei a ngai a ti. Vawiina Indian Institute of Technology-IIT Bhilai Convocation ah heh thu hi sawiin Pi Murmui chuan tlangmite chu an khawsakphung atangin hriatna tam tak chhekkhawltu an ni a ti a. Heng an hriatna leh thiamna te hi ram hmasawna turin tangkai takin a hman theih a ti a. Nasa zawka ram hmasawna an thawh ve loh chuan ramin hmasawna tak tak a thleng thei lo a ti bawk. Vawiin convocation ah hian zirlai 7 hnenah gold medal hlan a ni a. Chhatisgarh Governor Ramen Deka leh Chief Minister Vishnu Deo Sai te pawh an tel a ni.

<><><>

MANN KI BAAT

Prime Minister Narendra Modi chuan naktuk Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hman leh dawn a. Mizo tawnga lehlalin a zui ang. Tun tum ami hi episode 115-na tur a ni. Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>